



漢書地理志補注卷三十三

常熟 吳卓信 編纂

北海郡

左傳僖四年楚子使與師言曰君處北海 方輿紀要

——故齊地今青州府以東是其境 按漢——今山

東青州府之益都壽光昌樂安邱四縣萊州府之濰昌邑

高密三縣皆其地

景帝中二年置

續郡國志北海國景帝置 地理志稽疑北海故屬秦齊

郡文帝十六年屬菑川國景帝中二年分置尋以支郡收

屬青州縣二十六

營陵劇魁安邱執淳于益平壽劇都昌平望平的柳泉壽
光樂望饒斟桑犢平城密鄉羊石樂都石鄉上鄉新成成
鄉膠陽

營陵或曰營邱

春秋僖十四年諸侯城緣陵 史記齊世家太公東就國
萊夷來伐與之爭營邱 應邵曰師尚父封於營邱陵亦
邱也 臣瓚曰營邱卽臨淄也——春秋謂之緣陵 師
古曰臨淄營陵皆舊營邱地 括地志——故城在青州
北海縣南三十里 齊乘昌樂縣東南十餘里有——城
方輿紀要——城在青州府昌樂縣東南五十里卽太
公望所封之營邱也 肇域記漢書齊郡治臨淄北海治

——二郡並云師尚父所封然史記言營邱邊萊其地烏
鹵人民寡呂氏春秋言太公封于營邱之諸海阻山高險
固之地而臨淄之徒乃在太公之後六世獻公則營邱之
東邊者爲是今謂之營邱社 新校地理志志於齊郡臨
淄下云師尚父所封又于此下云或曰營邱兩說並存者
不審信也爾雅水出其左曰營邱郭注云齊之營邱淄水
出其南及東則非此矣水經注營邱城無水惟城北有一
水世謂之白狼水則亦以此爲非矣史記武王封太公於
營邱胡公徙薄姑獻公徙臨淄又云營邱邊萊則又以此
營邱爲是矣 按左傳諸侯城緣陵而遷杞杜注緣陵杞
邑蓋是時淮夷病杞齊桓遷之稍北以自近如楚遷許于

葉吳遷蔡于州來然杜云杞邑則仍為杞地之錯入於齊者耳今青州府昌樂縣東南十里有營臺即漢一一故城也 又按功臣侯表高帝十一年封劉澤為一一侯即此莽曰北海亭

劇魁

方輿紀要漢一一縣屬北海郡又有劇縣亦屬北海蓋非菑川所治之劇縣也後漢時一一與劇縣俱省而移北海郡治菑川之劇縣 山東通志一一城在昌樂縣西十里 大清一統志一一故城在今青州府昌樂縣西北蓋亦與二劇相近 新校地理志一一疑即近劇之地賈逵云小阜曰魁

侯國

王子侯表一一夷侯黑武帝元朔二年以菑川懿王子封莽曰上符

安邱

左傳成八年申公巫臣與渠邱公立於池上杜注渠邱公莒子朱也渠邑邱名莒縣有蘧里 本書宣帝紀本始四年鳳皇集北海一一 孟康曰一一今渠邱是 伏琛齊記渠邱城在一一東北十里 續郡國志一一縣有渠邱亭 晉書地道記一一有渠邱城 水經注汶水又東逕一一縣故城北城對牟山漢高帝八年封將軍張敖為侯國 後書光武紀注一一即今密州一一縣 通典今密

州——縣漢舊縣有渠邱亭古昌安故城卽今縣外城
元和志今密州輔唐縣本漢——縣 寰宇記漢——縣
城在今縣西南二十里卽莒渠邱邑是也 山東通志——
——城在今——縣西南十五里卽古渠邱城也 大清——
統志——故城在今青州府——縣西南 按漢時——
有二一屬北海一屬琅邪屬北海者爲古渠邱卽今青州
府之——縣也屬琅邪者在今縣東南但渠邱亦有二一
在齊郡西安一在北海——在西安者爲齊大夫雍廩邑
在——者爲古淳于國地周武王封少昊之裔茲輿于莒
初都計後遷莒至莒子朱居渠邱卽與申公巫臣立池上
者諸家並言渠邱在——而非莒縣境與杜不合然地自

相隣也

莽曰誅郅

輒

師古曰——卽執字 集韻入聲二十六緝部——縣名在北
海 日知錄王子侯表——侯師古云——卽瓠字又音孤地
理志北海郡——縣又云——卽執字二音不同而功臣表——
講侯又云——與狐同河東郡下作狐講未知卽此一字否
也 地理志稽疑東平王傳瓠山晉灼引漢注作瓠山則
瓠音是也若執音則誤耳其又通而爲狐亦一也流俗字
則且以瓠爲報矣 新校地理志河東郡狐講縣表作瓠
講恐此亦狐字誤也顏籀之說非是

侯國

王子侯表一節侯息武帝元狩元年以城陽頃王子封

莽曰道德

淳于

春秋桓五年州公如曹左傳一一公如曹杜注一一州國

所都今城陽一一縣也後入于杞 本書宣帝紀本始四

年鳳皇集北海一一 水經汶水又北過一一縣西又東

北入于濰注云汶夏后氏之斟灌國也周武王以封一一

公號曰一一國其城東北則汶濰兩川交會處也 又云

濰水又北過一一縣東注云濰水又北左會汶水逕平城

亭西應劭曰一一縣東北六十里有平城亭 括地志一

一國在密州安邱縣東三十里古之州國 後書鄧禹傳

注一一縣故城在今密州安邱縣東北 大清一統志一

一故城在今青州府安邱縣東北三十里 春秋地志考

實桓五年州公如曹或謂州稱公與蔡公同此為畿內之

地即河內郡之州縣考河內之州乃蘇忿生邑隱十一年

桓王既與鄭矣此時豈復有州公乎蓋州即一一一一即

漢北海郡之一一縣也 按春秋正義引世本云州國姜

姓春秋經書州公傳言一一公杜解一一州國所都是也

是杞并一一在州公不復之後齊乘謂杞伯別號州公而

又妄造州公州公之稱且謂周封杞于牟婁可謂巨謬矣

益

水經注巨洋水又東北逕一縣故城東晏謨曰南去齊城五十里又西北流而注于巨波矣 山東通志一縣城在今壽光縣南七里 大清一統志一縣故城在今青州府壽光縣南二十里有城即漢縣也至武帝封菑川王子湖為一都侯乃鄉聚之名俗稱王胡城者是其地在今壽光縣北十五里曹魏時始即于此置一都縣即今青州府附郭之一都縣也與壽光縣南之一城無涉按水經注云巨洋水又東北逕一縣故城東又東北積而為潭西北流逕北一都城蓋當時一縣已廢故稱故城而一都則見設為縣也一南一北序次極明元和志寰宇記輿地廣記及齊乘所言並誤

莽曰探湯

舊作探陽誤 按後書劉盆子傳有王莽探湯侯田况章懷注云莽改北海一縣曰探湯則知舊本陽字之誤矣水經注又誤作滌蕩

平壽

左傳襄四年后羿用寒泥寒泥殺羿滅斟尋氏杜注寒國名北海一一縣東有寒亭斟尋夏同姓諸侯一一縣東南有斟亭 史記夏本紀禹後有斟尋氏索隱曰系本尋作鄩張敖地理記云濟南一一縣其地即古斟尋國 應劭曰一一故斟尋禹後今斟城是也 水經注一一故城在白狼水西水上承營陵縣之下流東北逕城東西入別畫

湖東北注海 師古云斗音斟 括地志斟尋故城今青州北海縣是 通典今青州北海縣本漢一縣 山東通志一一城卽今濰縣治本商周故邑 大清一統志一一故城在今萊州府濰縣西南 漢書考異壽光縣下亦引應劭云古斗灌禹後注中諸斗字皆斟之譌也草書甚作古與土相混因誤爲斗師古不能是正乃音斗爲斟廣韻二十二侵部亦兼收斟斗二字蓋六書之不講隋唐人已然矣

劇

水經注西丹水自凡山北流逕一縣故城東二丹水注之東丹水出方山北逕一縣合西丹水而亂流 齊乘亦足

云七達謂之一北海一縣有此路 方輿紀要一故城在今青州府昌樂縣 按漢時一縣有二一屬北海一屬菑川屬北海者其地在今昌樂府屬菑川者其地在今壽光縣昌樂壽光今並屬青州府去府東各七十里壤地相接是漢時二十縣亦連壤也後漢省并郡縣始廢菑川之一而移北海之一治菑川自來地志多未明晰

侯國

王子侯表一原侯錯武帝元朔二年以菑川懿王子封

都昌

左傳襄二十八年與晏子邶殿其鄙六十杜注邶殿齊別都蓋以邶殿邊鄙六十邑與晏嬰也 晏子春秋景公封

晏子以——辭不受 水經注濰水又東北逕——縣故
城東又東北入于海 本書韓信傳注師古曰——一名
臺昌 一統志——故城在今萊州府昌邑縣西二里後
漢書注謂在青州臨朐縣東北乃宋徙治之——非漢縣
也 按——即春秋之邶殿也 又按史記功臣侯表有
——嚴侯朱軫高帝六年封水經注以爲即此而本志無
之存以俟考

有鹽官

平望

水經注丹水又東北逕望海臺東東北注海蓋亦縣所氏
者也 又云巨洋水又東北逕望海臺西東北流伏琛晏
謨並以爲——亭在平壽縣故城西北八十里故縣也又
或言秦始皇升以望海因曰望海臺未詳也又東北注于
海 後書皇后紀注——縣屬北海郡今青州北海縣西
北——臺是也一名望海臺 一統志——故城在今青
州府壽光縣東北三十里

侯國

王子侯表——夷侯賞武帝元朔二年以菑川懿王子封
莽曰所聚

平的

史記作平酌 師古曰的音丁歷反其字從白 宋祁曰
的當作的从日

侯國

王子侯表——戴侯彊武帝元朔二年以菑川懿王子封

柳泉

一統志——故城在今青州府益都縣東

侯國

王子侯表——節侯強宣帝地節四年以膠東戴王子封

注曰南陽誤也膠東王子並封北海

莽曰宏睦

宋祁曰睦當作陸

壽光

左傳襄四年寒浞滅斟灌氏杜注斟灌夏同姓諸侯樂安

——縣東南有灌亭 應劭曰——古斟灌禹後今灌亭

是水經注巨洋水自北益都城西北流而注于巨淀又

自巨淀湖東北流逕——縣故城西 括地志斟灌故城

在青州——縣東五十四里 通典今青州——縣本漢

舊縣也 寰宇記斟灌城亦名東—— 方輿紀要——

縣在今青州府東北七十里 山東通志——城在今縣

西北六十里清水泊東 大清一統志——故城在今青

州府——縣東 按王子侯表有陸元侯何菑川靖王子

注曰——當是——縣之鄉名

有鹽官

金史地理志——縣廣陵鎮有鹽場 齊乘官臺在——

縣北七十里。有鹽官壽光縣志官臺場在縣北八十里。產鹽。

莽曰翼平亭

按王莽傳有翼平連帥田况據本志翼平即一而莽置連帥則莽嘗分北海之一一為郡矣

樂望

齊乘壽光縣東有一一城漢縣今名王望店 大清一統志一一故城在今青州府壽光縣東五十里

侯國

王子侯表一一孝侯光宣帝地節四年以膠東戴王子封饒侯國

王子侯表一一康侯成宣帝地節四年以膠東戴王子封斟故國禹後

史記夏本紀禹後有一氏 京相璠曰一一城西北去灌城亭九十里 寰宇記故一一城在萊州東南五十里 大清

一統志廢一一縣城在今萊州府濰縣東亦古斟尋國也

桑犢

說文作一瀆 寰宇記廢一一縣在今濰州東三十里 大清一統志一一故城在今萊州府濰縣

覆醜山漑水所出東北至都昌

屬本郡

入海

說文漑水出北海一瀆覆甌山東北入海从水既聲 水
經注覆甌山世謂之塔山漑水世謂之鹿孟水亦曰戾孟
水皆非也其水北流逕斟亭西北今日白狼水 師古曰
漑音功代反 寰宇記唐天寶六載敕改覆甌山為漑源
山 齊乘漑水即今東丹河 大清一統志漑源山在今
濰縣東南四十里即古覆甌山也漑水出此北流至昌邑
縣境入海舊志謂之東丹河

平城

水經注濰水又北左會汶水北逕一一亭西應劭曰淳于
縣東北六十里有一一亭故縣也 方輿紀要一一城在
今昌邑縣西南四十里 大清一統志一一故城在今萊

州府昌邑縣東

侯國

王子侯表一一釐侯邑成帝建始二年以膠東頃王子封
密鄉

春秋隱二年紀子帛莒子盟于密杜注密莒邑城陽淳于
縣東北有一一 水經注濰水又東北逕一一亭西應劭
曰淳于縣東北六十里有平城亭又四十里有一一亭故
縣也 大清一統志一一故城在今萊州府昌邑縣東南
十五里

侯國

王子侯表一一頃侯林成帝建始二年以膠東頃王子封

羊石侯國

王子侯表——頃侯回元帝永光三年以膠東頃王子封樂都

侯國

王子侯表——湯侯訢成帝建始二年以膠東頃王子封莽曰拔壘一作杖一作枝也

宋祁曰南本無一作以下七字

石鄉

侯國

王子侯表——湯侯理元帝永光三年以膠東頃王子封一作正鄉

宋祁曰南本無此四字

上鄉

侯國

王子侯表——侯歙元帝永光三年以膠東頃王子封新成

侯國

王子侯國新城節侯根元帝永光三年以膠東頃王子封成鄉

寰宇記——故城在今安邱縣北界 一統志——廢縣在今青州府安邱縣北

侯國

王子侯表——釐侯安成帝建始二年以高密頃王子封
莽曰石樂

膠陽

水經注膠水又北逕——縣東晏謨伏琛並謂之東亭是
自亭結路南通夷安地理風俗記曰淳于縣東南五十里
有——亭故城也 一統志——故城在今萊州府高密
縣西北

侯國

王子侯表——侯漢元帝初元二年以高密哀王子封
按今高密縣西北三十四里有高陽城寰宇記云漢成帝
封淮陽王縣並為高陽侯一名膠陽亭今據本志——屬

北海高陽屬琅邪王子侯表——侯恁以成帝建始二年
封而高密陽侯並封于平帝元始元年時高密王子恁正
侯——其不得為一國明甚水經注膠水又北逕——縣
東又東北會張奴水按其地適在高密之北則此城為——
——故縣無疑俗以膠音近高因訛其讀而寰宇記遂附會
為高陽侯並之封國又以平帝為成帝齊乘復承其誤何
也

漢書地理志補注卷三十四

東萊郡

常熟 吳卓信 編纂

禹貢青州萊夷作牧 國語通齊國之魚鹽于東萊韋注

東萊齊東萊夷也 師古曰古萊子國也通典今萊州春

秋萊子國也齊侯遷萊子于郕在齊國之東故曰東萊

蔡氏書傳萊夷萊山之夷即今萊州之地 方輿紀要

——故齊地今登萊二府是其境 尚書地理今釋蔡傳

以萊夷為今萊州之地然元和志云故黃城在登州黃縣

東南二十五里古萊子國是今之登州府亦禹貢萊夷地

不獨萊州府矣 按漢——今山東萊州府之掖縣及

平度州登州府之黃萊陽文登榮成四縣及寧海州皆其地

高帝置

地理志稽疑東萊故屬秦琅邪郡高帝分置屬齊國景帝後以支郡收

屬青州縣十七

掖腫平度黃臨朐曲成牟平東牟嶷育犁昌陽不夜當利盧鄉陽樂陽石徐鄉

掖

戰國策魯仲連謂田單曰將軍東有夜邑之奉通鑑周赧王二十六年齊封田單於一後書歐陽歛傳注一今

萊州一縣元和志今萊州郭下一縣本漢舊縣也一水

出縣南三十五里寒同山故縣取為名大清一統志一

縣故城即今萊州府一縣治一水亦名一河出縣南西北

注于海水道提綱南陽河即古一水源出萊州府一縣

東南山西北流經府城西而北至海神廟東北入海新

校地理志楚漢春秋有夜侯虫達即此縣古夜一字通

莽曰一通

腫

史記作鍾應劭曰音甍徐廣讀為緹師古音直瑞

反又音丈瑞反集韻一或作鍾史記始皇本紀並勃

海以東過黃一集解東萊有黃縣一縣本書主父偃傳

秦始皇使天下飛芻輓粟起于黃一琅邪負海之郡轉輸北河師古曰黃一二縣名 十三州志牟平縣古一縣也 通典今登州文登縣漢一縣北有文登山 寰宇記一縣故城在今文登縣西七十里清陽水側近與之朶山相對 齊乘一城在寧海州東三十里臨清陽水故名清陽城又名陽庭城 名勝志漢一縣在今登州府文登縣西七十里清陽水側 大清一統志一縣故城在今登州府文登縣西 按恩澤侯表高后三年封呂嘉爲一侯六年又封呂通爲一侯並卽此 有之朶山

史記始皇本紀二十八年登之朶立石頌德三十七年又自琅邪連舟下海登之朶射巨魚 本書武帝紀太始三年行幸東海登之朶 括地志之朶山在萊州文登縣西北一百九十里文登卽古一縣也 寰宇紀之朶山在海中高九里周五十里東南水中有壘石俗傳漢武帝造橋有兩石銘猶存 齊乘之朶山在寧海州西北五十里西南至福山縣長三十餘里 大清一統志之朶山在今登州府福山縣東北三十五里接文登縣界三面距海一徑南通

祠居山上

舊作居上山誤 史記封禪書八神五曰陽主祠之朶 本書郊祀志宣帝時祠之朶于一 大清一統志陽主祠

今在之朶山下

聲洋丹水所出東北入海

師古曰洋音祥 齊乘寧海州東三十里有朶城秦漢負海縣後并入牟平唐初置清陽縣後廢入文登城對之朶山臨清陽水故名清陽城清陽漢志作聲洋 方輿紀要清陽水卽清洋河在登州府福山縣東十里北注于海聲清音相近聲洋卽清陽也 大清一統志清洋河亦名大海發源棲霞縣翠屏山東遶城北流折而東經福山縣東北入海又白洋河源出靈山遶翠屏山而西又義井河源出翠屏山西麓並北流合清洋河 水道提綱清洋河卽義井河源出棲霞縣東南翠屏山西北流經縣城南又東北流經福山縣城東南又北入海 地理志稽疑樂史更于文登縣云丹水蓋在今縣西七十里清陽水側近與之朶山相對顧宛溪云亦謂之清陽河殆卽聲洋之轉今福山境也然則漢志殆失去一河字 新校地理志太平御覽引此作梁山丹水所出疑聲洋二字誤也

平度

本書五行志哀帝延平三年東萊朶朶出大魚長八尺高丈一尺七枚皆苑 水經注膠水又北逕朶朶縣縣有土山膠水北歷土山注于海海南土山以北悉鹽坑相承修養不輟北眺巨海杳冥無極天際兩分白黑方別所謂溟海者也 元和志朶朶故城在今萊州膠水縣西北六十

七里城西北有土山古今煮鹽處 肇域記今——州西北六十里有——故城漢縣膠水經此城北入海 大清一統志——故城在今萊州府——州西北六十里 按王子侯表——康侯行武帝元朔二年以菑川懿王子封卽此

莽曰利盧

黃

春秋宣七年公會齊侯伐萊杜注萊國今東萊——縣 又襄六年齊侯滅萊 左傳襄十四年齊人以邾寄衛侯杜注邾卽齊所滅萊國 又哀五年齊景公寘羣公子于萊杜注萊齊東鄙邑 通典今登州所理蓬萊縣漢——縣地

武帝于此望海中蓬萊山因築城以爲名遂置蓬萊縣

元和志今登州——縣本漢舊縣故城在縣東南二十五里又郭下蓬萊縣亦漢——縣地 寰宇記——縣故城在今登州——縣東南二十五里古萊子之國 方輿紀要故——縣在今膠州——縣東二十五里一名東——城卽今萊子國都也 大清一統志——縣故城在今登州府——縣東南 按齊世家云太公東就國萊夷與之爭營邱然則萊爲殷時諸侯也其地今名龍門居山峽之間鑿石通道極爲險隘土人呼爲萊子關路史謂卽萊朱國以其地有黃山故縣取名焉

有萊山

晉書地道記縣東二百三十里至海中連岑有土道秦始皇登此山刻二碑東二百三十里有始皇漢武帝二碑

元和志萊山在今一縣東南二十里 大清一統志舊志云萊山一名萊陰山下有黑虎洞

松林萊君祠

史記封禪書齊八祠萊山為月主山有月主真人祠山本書郊祀志宣帝時祠萊山于一 名勝志一縣萊山漢人祠月之處 大清一統志月主祠在萊山之麓

莽曰意母

臨胸

師古曰齊郡已有一一而東萊又有此縣蓋各以所近為

名也此類非一 寰宇記一一故城在今萊州北二十三

里 方輿紀要掖縣北二十里有一一故城此東萊郡之

一一也 大清一統志漢東萊郡一一縣故城在今萊州

府掖縣北 按王子侯表有一一夷侯奴武帝元朔二年

以菑川懿王子封注曰東海而本志屬東萊蓋東海是胸

東萊是一一則表誤也

有海水祠

寰宇記郡國縣道記云一一有海水祠今故城北去海三

十里南去海神祠五六里與漢志注同 齊乘今海神廟

宋初所監去海才二三里與古不同矣 大清一統志海

神廟在今萊州府城西十八里祀四海之一也

莽曰監胸

曲成

寰宇記曲成故城在今萊州掖縣東北六十里 方輿紀要曲城廢縣在今萊州府東北六十里 大清一統志曲成故城在今萊州縣掖縣東北 按王子侯表中山靖王子萬歲封——侯當卽此 又按功臣侯表有曲成侯虫達索隱曰表在涿而今本無之據本志東萊有曲成縣胡梅礪以爲卽蟲達所封考列侯位次曲成侯又稱夜侯夜卽古掖字曲成與掖俱屬東萊益知非涿地審矣 有參山

史記封禪書八神四曰陰主祠三山索隱曰顧氏案地理志東萊——有參山卽此三山也小顏以爲海中三神山非是 本書郊祀志宣帝時祠參山八神于—— 寰宇記三山島在掖縣北五十里 齊乘三山在萊州北二十里

萬理沙祠

封禪書於是天子旣出無名乃禱萬里沙應劭曰萬里沙神祠也在東萊——孟康曰萬理沙徑三百餘里 三齊記水北有萬歲亭漢武所築 括地志萬里沙在掖縣東北三十里 寰宇記夾萬歲水兩旁皆沙 方輿紀要萬歲沙在今萊州府東北三十里其兩旁卽萬歲沙也秦皇漢武皆常禱此 大清一統志萬里沙在掖縣東北舊志

謂之萬歲河其入海處即小石灣海口也

陽邱山

大清一統志陽邱山在今萊州府掖縣東南三十里亦名

馬鞍山

沽水

舊作治水誤

所出南至計斤

屬琅邪郡舊作臨沂誤

入海

說文治水出東萊曲城陽邱山南入海从水台聲 左傳

昭二十年晏子曰姑尤以西杜注齊東界也姑尤二水名

皆在城陽郡東南入海 齊乘姑即大沽河尤即小姑河

沽水起北海至南海行三百餘里絕齊東界故曰姑尤以

西 今水經沽河有二大沽河源出登州府黃縣蹲犬山

小姑河源出萊州府東南馬鞍山大沽南流小姑東南流

至平度州乃合至膠州即墨縣入海 大清一統志沽河

有二源一自登州府黃縣蹲犬山南流逕萊陽縣入平度

州界名大沽河一自萊州府掖縣馬鞍山南流至平度州

東七十七里名小姑河至州東南朱毛城東合流逕即墨

膠州至麻灣口入海 水道提綱大沽河出黃縣東南之

盧山亦曰蹲犬山二源並導合而南流經萊陽縣西小沽

河自西北來會又南流至膠州東北會南膠河經州東又

南至麻灣口入於海 全氏七校水經注漢志齊魯之間
有二治水一出太山南武陽冠石山南至下邳入河一出
東萊一一陽邱山南至臨沂入海說文有一一無武陽似
一一之治水較大于武陽者酈氏于河水篇之治水作泐
水以爲卽武水但並不言泐水所出而于臨沂之治水則
不言其出于一一之陽邱卽以爲出於武陽之冠石又不
言其入海而以爲入沂則此臨沂之治水其所出所入皆
與漢志戾且引應劭之言以爲卽武水則一武水也俄而
爲泐水則入河俄而爲治水則入沂真不可曉顧宛溪曰
泐河有二東泐入沂西泐入河蓋河沂交會之處故有此
謬然則并臨沂之治水亦是泐水也而出自一一之治水

究安屬乎蓋漢志暨說文東萊之治水但當于膠濰之間
入海不應間關二千里而至臨沂歷河濟淮三瀆以入海
也况續志晉魏諸志以及元和寰宇九域諸志皆無一一
治水之目又深可疑也予親至東萊訪諸古跡方知漢志
一一之治水卽春秋之沽水左氏云姑尤以西杜注姑大
沽水也尤小沽水也地形志曰長廣郡長廣縣有沽水樂
永言曰沽水乃齊境也漢之一一在今掖縣小姑水出焉
其東則黃縣大沽水出焉經福山而招遠而萊陽至于平
度卽墨之間而合其流三百餘里自東而南直趨膠州之
麻灣口明世議海運者之道也若漢志所云南至臨沂者
非臨沂也乃計斤也漢之計斤在今膠斤州卽墨之境蓋

以字形相近而譌考東萊之水未有古於沽水者亦未有
大于沽水者不應見遺于史豈知其爲治水之譌也 錢
氏新校地理志治水卽今沽河也大沽河源出黃縣東南
廬山南流經萊陽縣西合小姑河小姑河出萊州府城東
南馬鞍山東南流合大沽河經膠州東入海大沽河古曰
姑小沽河古曰尤所謂姑尤是也今山無陽邱之目水有
兩沽之稱疑治字卽沽字之譌至臨沂當作至計斤漢之
計斤正今膠州卽墨之境沽河入海之道也

有鹽官

金史地理志萊州卽墨縣有曲裏鹽場

牟平

隋書地理志——有牟山 元和志今登州——縣本漢
縣以在牟山之陽其地夷坦故曰——又文登縣亦漢——
——縣地 寰宇記——故城在今登州蓬萊縣東南九十
里 大清一統志——故城在今登州府黃縣東南十五
里馬嶺山 按王子侯表——共侯濞武帝元朔四年以
齊孝王子封卽此

莽曰望利

東牟

元和志——故城在今登州文登縣西北十里 大清一
統志——故城在今登州府文登縣西北 按王子侯表
高后六年封齊悼忠王子興居爲——侯卽此

有鐵官

寰宇記鐵官山在牟平城百里錮鐵之處猶有漢置鐵官
名勝志鐵官山在文登縣西一百四十里漢嘗於此置
官鑄冶遺跡尚存 大清一統志鐵官山在今寧海州西
南四十里漢鐵官鑄冶處

鹽官

明統志登州土產鹽

莽曰宏德

幌

說文一布出東萊从巾弦聲 晉書地道記及續志並作
幌 廣韻作捩縣名在東萊一布名 師古曰音堅 唐

書地理志登州土貢貫布 寰宇記一故城在今黃縣西
南二十五里 集韻一布出一縣 方輿紀要一城在今
膠州黃縣南一百二十里晉惠帝時東萊一令劉伯根反
自稱一公幽州都督王浚討之即此 山東通志一城在
今登州府蓬萊縣西接黃縣界 大清一統志一縣故城
在今登州府黃縣西南

有百支萊王祠

按晉書地道記王作君

有鹽官

育犁

寰宇記一一故城在今登州文登縣西南一百二十里瀨

港水側其地良沃故以爲名 齊乘——故城在寧海州西北八十里漢縣後漢省入牟平 寰宇通志——城在今寧海州東南 大清一統志——故城在今登州府寧海州界府東一百二十里

昌陽

應劭曰昌水所出 永初山水記——縣有昌水 後書琅邪孝王傳注——今萊州縣也故城在聞登縣西南 元和志今萊州——縣本漢舊縣在昌水之陽故名 寰宇記——故城在今文登縣西南三十里 肇域記萊陽縣東南二十餘里有——城漢縣也 大清一統志——故城在今登州府萊陽縣東南二十五里昌山南山在文

登縣西南十里昌水出焉其水西南流逕萊陽縣東南四十里名水口河又名昌陽水合五龍河南入海 水道提綱昌水河出萊陽東南境昌山合四水爲五龍河入于海 按王子侯表成帝封泗水戾王子霸爲——侯卽此有鹽官莽曰夙敬亭 不夜

解道彪齊地記——在陽庭城東南古有日夜出見于東萊故萊子立此城以——爲名 元和志——故城在登州文登縣東北八十五里海濱 寰宇記——城卽春秋時萊子所置邑以日出于東故以——爲名在今文登縣東北八十里 大清一統志今登州府文登縣治卽漢——

一縣也

有成山日祠

史記封禪書八神七日日主祠成山成山斗入海最居齊東北隅以迎日出云 本書郊祀志宣帝時祠成山于一 史記始皇本紀二十八年過黃腫窮成山二十九年東遊登成山 本書武帝紀大始三年春二月幸琅邪禮日成山如淳曰祭日于成山也 括地志成山在萊州文登縣東北一百八十里 齊乘成山在文登縣東北一百五十里古一一城側旁多椒島海艘經此失風多覆海道極險處也 大清一統志日主祠在成山之陽 日知錄寰宇記秦始皇登勞盛山望蓬萊後人因謂此山一名勞

盛山誤也勞盛二山名勞卽勞山盛卽成山封禪書七日日主祠成山成山斗入海漢書作盛山古字通用齊之東偏環以大海海岸之山莫大于勞成二山故始皇登之始皇紀令入海者齋捕魚具而自以連弩候大魚至射之自琅邪北至榮成山弗見至之罘見巨魚射殺一魚正義曰榮成山卽成山也按史記及前代地理書並無榮成山向疑其文在琅邪之下成山之上必勞字之訛後見王充論衡引此正作勞成山乃知昔人傳寫之誤唐時諸君未之詳考遂使勞山并盛之名成山冒榮之號耳 方輿紀要勞山在今膠州卽墨縣東南六十里二山相連東濱大海其高大者曰大勞差小者曰小勞周圍八十里高二十五

里勞亦作嶗或誤為牢又誤為勞盛山勞盛蓋二山盛即盛山也秦始皇登勞盛山望蓬萊蓋登此二山耳又史記始皇自琅邪北至榮成山榮成又勞成之所誤也蓋海岸之山莫口于成山勞山故往往並言之耳

莽曰夙夜

按王莽傳有夙夜連率韓博獻勇士巨無霸據本志夙夜即一一而莽置連率則莽嘗分東萊之一一為郡矣

當利

本書孝武紀以口長公主妻欒大更名其邑曰一一寰宇記一一故城在今萊州西南三十六里肇域記掖縣西南四十里有一一城漢縣也水經膠水又北過一一

縣西北入于海

大清一統志一一故城在今萊州府掖

縣西南

有鹽官莽曰東萊亭

盧鄉

伏琛齊記一一城東南有大豁口與小豁口相峙中通驛路後書琅邪孝王傳注一一故城在今昌陽縣西北

寰宇記一一故城在今萊州膠水縣西北五十里肇域

記平度州西北五十里有一一城漢縣也大清一統志

一一故城在今登州府萊陽縣西南四十里萊州府平度

州西北按恩澤侯表平帝元始五年封陳鳳為一一侯

即此

陽樂

十三州志——城在當利縣東北二十里 寰宇記其地

蓋在今萊州西南二十里內 肇域記掖縣北四十里有

——城漢縣也 大清一統志——廢縣在今萊州府掖

縣西南

侯國

王子侯表——侯獲成帝建始二年以膠東頃王子封

莽曰延樂

陽石

王子侯表成帝鴻嘉四年封膠東共王子慶為——侯

五行志——公主坐巫蟲死 十三州志當利縣東有——

——城

寰宇記——城在掖縣南當利故城東 大清一

統志——廢縣在今萊州府掖縣南 漢書顏注拾遺五

行志——公主師古以為北海之縣字亦作羊非也據地

志東萊有——縣是矣北海羊石侯國也如何合而一之

莽曰識命

徐鄉

齊乘——城漢縣蓋以徐福求仙為名故城在今黃縣境

內 大清一統志——故城在今登州府黃縣西南五十

里 按王子侯表成帝封膠東共王子炂為——侯注曰

齊而志屬東萊據王莽傳始建國元年四月徐鄉侯劉快

起兵討莽不克死炂即快蓋表誤也

漢書地理志補注卷三十五

琅邪郡

常熟

吳卓信

編纂

玉篇瑯琊郡名正作琅邪

後書光武紀注郡有——山

故名故城在今海州朐山縣東北

方輿紀要——今

兗州府東境沂州青州府南境莒州萊州府南境膠州一

帶皆是其地 大清一統志——山在今諸城縣東南一

百五十里亦曰——臺漢置——以此取名 段氏說

文注尋周時——之名未知何解許君以其字从邑傳合

郡名為釋耳九經字樣云郎邪郡名郎良也邪道也以地

居鄒魯人有善道故為郡名今經典玉旁作良者譌未知

其說所出古書絕無作郎者且琅邪齊地非鄒魯地邪古書用爲袞正字又用爲助辭如乾坤其易之門邪乾坤其易之緼邪今人文字邪爲疑辭也爲决辭古人多不分別如子張問十世可知也當作邪字是也 按漢———今山東沂州府之藍山沂水日照三縣及莒州青州府之臨朐安邱諸城三縣萊州府之高密卽墨二縣及膠州登州府之乘陽縣又江南海州之贛榆縣皆其地

秦置

史記始皇本紀二十六年置———地理志稽疑———故屬秦郡楚漢之際屬齊國高后七年爲———國文帝元年復屬齊國景帝後以文郡收

莽曰填夷

師古曰填音竹人反

屬徐州

晉書地理志 徐州按禹貢海岱及淮之地舜十二牧則其一也於周入青州之域春秋元命包云天氏流爲徐州蓋取舒緩之義或云因徐邱以立名秦兼天下以置泗水薛琅邪三郡楚漢之際分置東陽郡漢又分置東海郡改泗水爲沛改薛爲魯分沛置楚國以東陽屬吳國景帝改吳爲江都武帝分沛東陽置臨淮郡改江都爲廣陵及置十三州以其地爲徐州

有鐵官縣五十一

東武不其海曲贛榆朱虛諸梧成靈門姑幕虛水臨原琅邪被柅餅邾莒段黔陬雲計斤稻臯虞平昌長廣橫東莞魏其昌茲鄉箕裨高廣高鄉柔卽來麗武鄉伊鄉新山高陽昆山參封折泉博石房山慎鄉駟望安邱高陵臨安石山

東武

功臣侯表——貞侯郭蒙高帝六年封 水經濰水又東北過——縣西注云縣因岡為城城周三十里 括地志漢——故城卽今密州諸城縣 隋志高密郡諸城縣舊曰——開皇十八年改 元和志今密州郭下諸城縣漢——縣屬琅邪郡樂府章所謂——吟者也 肇域記諸

城縣有南北二城漢所築——縣城也有四門秦琅邪郡治此漢初以封諸侯王而——縣為附郭北城後魏永安二年分——為膠州所築隋開皇五年更為密州城但有東西二門撤——北垣而合之 大清一統志——故城卽今青州府諸城縣治

莽曰祥善

不其

本書武帝紀太始四年夏四月幸——如淳曰——山名因以為縣其音基 又恩澤侯表高后元年封呂種為——侯 又何武傳為大司空封汜鄉侯汜鄉在琅邪——後書皇后紀注——縣故城在今萊州卽墨縣西南

寰宇記——山在今即墨縣東南四十五里故城在縣西南二十七里約周十餘里 方輿紀要——山在今膠州即墨縣東南四十里漢末逢萌隱此又後漢鄭康成亦教授于山下又名馴虎山後漢童恢為——令有伏虎之異也 山東通志——城在今即墨縣西南二十七里 大清一統志——故城在今萊州府即墨縣西南縣志云今名——社 按續郡國志作不期非是伏湛封——侯不作期也

有太一僊人祠九所

寰宇記中山祠在今即墨縣東南五里漢志云——山有大一仙人祠九所此其一也 新校地理志交門宮亦其一也

一也武帝太初四年起

及明堂武帝所起

寰宇記女姑山在今即墨縣西南三十八里其山北舊有古墓老傳云此為明堂即漢志云武帝所起者

海曲

本書王莽傳天鳳四年琅邪女子呂母起兵攻——殺其宰 袁宏後漢紀琅邪呂母結眾為子報仇殺縣長起兵於——赤眉皆其黨今有呂母固 續志劉昭注補博物記云——太公呂望所出今有東呂鄉 水經注涓水北逕萇鄉城東漢分諸縣之東為——縣故城俗謂此城為東諸城 後書劉盆子傳注——縣故城在今密州莒縣

東 元和志漢——縣在今密州莒縣東一百六十里地
有東莒鄉東呂里太公望所出也 齊乘日照縣在莒州
東南一百五十里海濱十里蓋漢——縣地 大清一統
志——故城在今沂州府日照縣西府志云在縣西十里
地理志稽疑——當作海西東京初年劉永封董憲之
地東海亦有此縣今流俗本大抵譌爲——
有鹽官

大清一統志濤浴鎮在日照縣東南四十里舊志云明設
鹽課司于此

贛榆

春秋昭十九年齊伐莒莒子奔紀鄆杜注紀鄆——地名東

海——縣東北有故紀城 史記田儋傳田橫入海居島

中正義曰海州東海縣有島山去岸八十里 水經注游

水又東北逕——縣北東側巨海有秦始皇碑在山上

海一百五十步游水至加其上三丈去則三尺又東北逕

紀鄆故城南又東北入于海 師古曰贛音紺榆音踰

晉書音義贛音感 後書劉永傳注——縣今海州東海

縣也贛音貢 通典海州東海縣本秦末田橫所保鬱州

亦曰郁州漢——縣是 元和志——故城一名鹽倉城

在今東海縣東北三十里 寰宇記——故城東今海州

東海縣東北五十里青山之陰 又云田橫島在今卽墨

縣東北百里其島四面環海去岸二十五里可居千餘家

又云田橫國在今東海縣東北六十一里 輿地廣記東海縣治鬱洲四面環海卽田橫所保也有郁州山一名蒼梧山俗傳此山在蒼梧徒來上有南方株木 寰宇通志漢——城在淮安府廢東海縣北五十里遺址尙存田橫國在今——縣東北八十里小鬲山壘石爲城周向二百四十步高一百七十步孤峰峙秀俯臨深溪惟東隅可通人行 大清一統志——故城在今海州——縣東北朱虛

王子侯表高后二年封齊悼惠王子章爲——侯 水經注巨洋水北流逕——縣故城西十三州志曰丹朱遊故虛故云——朱猶丹虛猶邱也 括地志——故城在青

州臨朐縣東六十里 大清一統志——故城在今青州府臨朐縣東舊志云今縣東北廟山社有遺址土人猶呼爲城頭

凡山丹水所出東北至壽光屬北海郡

入海

史記五帝本記黃帝東至于海登丸山徐廣曰丸一作凡裴駰曰按地理志丸山在琅邪朱虛縣索隱曰凡音扶巖反 竹書紀年堯放丹朱于丹水 水經注地理俗風記曰丹山在西南丹水所出東入海丹水猶由——邱阜矣故言——城西有長坂遠峻名爲破車峴城東北二十里

有丹山世謂之凡山縣在西南非山也丹凡字相類皆從字變也丹水有二源各導一山世謂之東丹西丹水也西丹自穴山北流逕劇縣故城東東丹水注之出方山山有三水一水即東丹水也北逕縣合西丹水而亂流又東北逕漪溥澗北漪水入之謂之魚合口又東北逕望臺東東北注海 括地志丸山即凡山亦即丹山在青州臨朐縣界——故縣西北二十里丹水出焉 史記正義地理志惟有凡山蓋凡山丸山惟一山耳郊祀志云禪丸山師古云在——亦與括地志合明一山也 東萊大事記軒轅征不道東至海登丸山或偽為凡山俗謂之丹山西丹河白狼河皆源于此 齊乘凡山在臨朐東北三十里一名

丹山又名堯山下帶長阪曰破車峴東西二丹水出焉西丹出丹山在臨朐縣東北三十里東丹出方山在丹山東北二水皆分流至西樂廢城西北乃相合通名為丹河北入于海 今水經丹河有二東丹河源出昌樂縣東南二十里方山西丹河源出臨朐縣丹山二水皆北流至昌樂歷城西合流至壽光縣界入于海 大清一統志紀山在今昌樂縣西南五十里接臨朐縣界即古丹山西丹水發源于此 又云丹水有二源一出昌樂縣南方山為東丹河一出臨朐縣東北丹山為西丹河俱東北流經昌樂縣西北至昌樂故城西合流又東北經壽光縣東入濰縣界水道提綱大丹河即西丹水出臨朐縣東北之丹山東

北流經昌樂縣西北小丹河自南來會小丹河卽東丹水
出昌樂縣南之方山北流經縣城西而北與大丹河合又
東北入瀾河

東泰山

夏官職方青州山鎮曰沂山鄭注一名東泰山 史記封
禪書公玉帶曰岐伯令黃帝封東泰山禪丸山天子既令
設祠具至東泰山東泰山卑小不稱其聲乃令祠官祠禮
之而不封禪焉 鄭志——縣有小泰山公玉帶曰岐伯
令黃帝封東泰山卽此山也 臣瓚曰東泰山在琅邪朱
虛界中卽小泰山是也 元和志沂山在今沂水縣北一
百二十四里卽東泰山是也 齊乘沂山在臨朐縣南一

百里卽公玉帶請漢武所封之東太山也漢志謂卑小不
足稱其聲者蓋沂山遠望之則高壓羣山緣坡麓曼衍八
九十里以漸而升逮至其巔則失其峻極耳 大清一統
志沂山在臨朐縣南九十里與沂州府沂水縣接界亦曰
東泰山按鄭康成周禮注沂山爲沂水所出今沂水寔出
沂山縣雕崖山其流北去此山尙五十餘里蓋本二山也
自隋唐以來始混以此爲沂山耳 水道提綱沂山在臨
朐縣南卽所稱東太山也爲東省諸山之祖東自穆陵開
蜿蜒而西數十里其西麓爲沭水之源又西爲沂水之源
南卽沂水縣北境北麓則巨洋水所出也
汶水所出東至安邱

屬本郡

入濰

說文汶水出琅邪——東太山東入濰从水文聲 水經汶水出——縣太山北過其縣東又北過淳于縣西又東北入于濰注云汶水出——縣小太山伏琛晏謨並言水出縣東南嵒山山在小太山東者也自縣東北逕嵒城北又東逕安邱縣故城北其兩川交會之處則在淳于城東北也 齊乘沂山絕頂有瀑布泉懸百丈崖而下卽汶水也齊有三汶入濟之汶入濰之汶見漢書入沂之汶見水經此則入濰之汶也 禹貢錐指曾彦和云汶水有二出萊蕪縣原山入濟者徐州之汶也出——縣太山入濰者

青州之汶也予按原山北接淄川延袤跨青徐二州之境徐水其導源處猶爲青城故青之貢道書口于汶云 大清一統志汶水源出臨朐縣南沂山瀑布泉東流經縣東南六十里又東入安邱縣界經縣城北三里又東北入濰水 水道提綱東汶河源出沂山東北谷東流近穆陵關折而東北流又折而東流至安邱縣西南境經縣城西北與濰水會此汶之別源也 按顏氏云前言汶水出萊蕪入濟今此又言出朱虛入濰將桑欽所說有異或者有二汶水乎此讀水經注不熟也據水經明有兩汶水一出萊蕪縣原山入濟卽禹貢之汶水也一出——縣東太山入濰所謂東汶水也又有入沂之汶水見酈注沂水篇

中顏氏何荒謬至此

有三山五帝祠

師古曰五帝祠在濰水之上 寰宇記沂山東北四里有五壇是宋武帝伐燕立壇以祭五帝處

諸

春秋莊二十九年城一及防杜注一魯邑今城陽一縣

又文十二年城一及鄆 本書武帝紀征和二年一邑公主坐巫蠱死師古曰一邑琅邪縣也以封公主故謂之邑

水經注濰水又東北逕一縣故城西 後書安帝紀注

一縣故城在今密州一縣西南 元和志隋開皇十八年

改東武縣為一城縣取縣西三十里漢故一縣城為名

大清一統志一縣故城在今青州府一城縣西南二十里

府志云在石臺山東北一里濰河南岸

莽曰諸井

梧城

梧城

春秋莊元年齊師遷紀邢部杜注部紀邑在東莞朱虛

縣東南 說文部東海縣故紀侯之邑也从邑吾聲 水

經注汶水自朱虛縣東北逕梧城北地理風俗記曰朱虛

縣東四十里有部城亭故縣也 寰宇記部城在青州安

邱縣西南六十里嵒山中 肇域記嵒山四面險絕其上

寬平約數百畝有古城遺址即漢一一縣也 大清一統

志部城故城在今青州府安邱縣西南嵒山北亦作嵒又

作梧嶧山在縣西南六十里 按——即春秋紀國之郟
邑故隋初于此置郟城縣後廢

靈簡

郡國縣道記——縣在今密州莒縣西南六十里當沂水
縣東北一百里 寰宇記——故城在今沂州沂水縣西
北一百里 大清一統志——故城舊志云在今沂州府
莒州北一百二十里今日石埠城

有高桑山

師古曰桑即柘字 大清一統志高柘山在今莒州北西
接沂山齊乘以爲即巨平山者誤 漢書考異或曰桑乃
原之譌 按寰宇記本作高原山

壺山活水所出東北入濰

說文活水出琅邪——壺山東北入濰从水吾聲 水經

注濰水又北逕平昌縣故城東又北活水注之水出活山
世謂之巨平山其水謂之活汶東北流逕姑幕縣故城東
又東北至平昌縣故城北又東北注于濰水 師古曰活
音吾 齊乘活水今名南清河 肇域記巨平山在高柘

山西四十里

大清一統志壺山亦在莒州北即水經

注之活山聲近而譌也活水亦名清河自莒州流入青州
府諸城縣界東北流至安邱縣東南四十里景芝鎮東入
濰水 水道提綱大活河出室泉村東南東流至景從鎮
南折而東北入濰小活河出安邱縣南境楊埠之東東北

流亦入濰

姑幕

水經注浯水東北逕——縣故城東縣有五色土王者封建諸侯隨方授之 寰宇記——城在今密州莒縣東北一百六十里 大清一統志——故城在今青州府諸城縣西北五十里

都尉治或曰薄姑

按薄姑即蒲姑其地在今博興縣東北與諸城縣南北相距五百餘里續志注地形志元和志寰宇記齊乘明統志諸書並同惟通典謂在密州莒縣東北蓋由班志而誤也 莽曰季睦

盧水

如淳曰盧音墟

侯國

王子侯表——康侯禹武帝元鼎元年以城陽頃王子封臨原

寰宇記——故城在今臨朐縣東輔唐縣之北 大清一統志——故城在青州府臨朐縣東

侯國

按王子侯表有臨象侯始昌武帝元朔二年以菑川懿王子封注云——似分——地置臨侯象國也據本志琅邪郡只有——注云侯國無所謂臨象者史表亦作——則

象爲原之譎審矣

莽曰填夷亭

琅邪越王句踐嘗治此起館臺

管子齊桓公將東游南至一一竹書紀年貞定王元年

越徙都一一吳越春秋越王句踐二十五年徙都一一

立觀臺周七里以望東海 孟子齊景公曰遵海而南放

于琅邪 戰國策蘇秦說齊王曰齊南有太山東有一一

史記始皇紀二十八年南登一一大樂之留三月乃徒

黔首三萬戶於一一臺下復十二歲作一一臺立石頌德

又三十七年北至一一 本書武帝紀元封五年東巡

北至一一並海 又太始三年復幸一一 山海經一一

臺在渤海間一一之東郭注一一臨海邊有山嶠嶢特起

狀如高臺此即一一臺也 水經注一一 本山名越王句

踐之故國秦始皇滅齊以爲郡城即始皇之所築也 括

地志密州諸城縣東南一百七十里有一一臺越王句踐

觀臺也 史記索隱海畔有山形如臺在一一故曰一一

臺 史記正義一一山在密州東南一百三十里一一臺

在山上 元和志一一山在諸城縣東南一百四十里

寰宇記一一故城在今諸城縣東南一百六十里東枕大

海 方輿紀要一一山三面皆浸于海惟西南通陸 大

清一統志一一故城在青州府諸城縣東南一百五十里

一一山下

有四時祠

史記封禪書八神八曰四時祠——在齊東方蓋歲之所始 本書郊祀志宣帝時祠四時于——

被

師古曰音廢 十三州志朱虛縣東十三里有校亭故漢縣也 寰宇記校縣故城在今臨朐縣東九十里 齊乘膠州西南七十里有一城漢侯國俗曰肥城廢音之轉也 大清一統志廢一縣在今萊州府膠州西南縣志亦謂之木馬城 按闕駟樂史竝以一為校一在朱虛東一在臨朐東同一地也而在所各異于氏以為膠州西南七十里是矣然城陽王子似不應封在膠州存以俟考

侯國

王子侯表校靖侯雲武帝元狩元年以城陽頃王子封 按校為一之譌無疑而索隱以為非是舛矣

莽曰被同

此四字舊在柜縣下誤今改正

柜

如淳曰音巨 續志水經注竝作柜 方輿紀要一城在

今膠州高密縣南三十里舊志謂在膠州西南九十里是也今縣西南三十里有一城河出縣南五十里王子山流入九口泊蓋因故城而名 大清一統志一縣故城在今萊州府膠州西南拒艾水今在州南其城又在黔陬之南

當在今州西南界 寰宇記謂在高密縣西南二十里疑誤

柜艾水東入海

舊志作根艾水誤 水經注柜艾水出縣西南柜艾山即齊記所謂黔艾山也東北流逕縣故城西世謂之王城又謂是水為洋洋水又東北入海 大清一統志艾山在膠州西南三十五里州志云艾山東西各五里許兩山對立俗名東西右耳柜艾水在膠州南亦名洋河 義門讀書記根艾水水經注作柜艾水在膠州南得名縣西南有柜艾山知根當作柜也或刻作相即柜之誤 漢書考異以水經注考之即柜艾水也根乃柜之譌俗本水經注

并作手旁更謬

餅

春秋莊元年齊師遷紀邢部部杜注邢紀邑在東莞臨朐縣東南 史表作餅 如淳曰音瓶 應劭曰邢一作駢臨朐有伯氏駢邑 括地志邢城在青州臨朐縣東南三十里 寰宇記一城在安邱縣西南與部城相近 山東通志一城在今安邱縣南 大清一統志一縣故城在今青州府臨朐縣東北亦作邢又作駢

侯國

王子侯表一敬侯成武帝元狩元年以菑川靖王子封

邦

說文一琅邪縣从邑夫聲 水經注膠水逕扶縣故城西
漢文元年封昌平爲侯國 師古曰音夫又音扶 山東
通志一縣在膠州西南境膠水之東 大清一統志廢一
縣在今萊州府膠州西南

膠水東至平度

屬東萊郡

入海

水經膠水出黔陬縣膠山北過其縣西又北過夷安縣東
又北過當利縣西北入于海注云齊記曰膠水出五弩山
蓋膠山之殊名也北流逕一縣故城西又北逕平度縣歷
土山入于海 齊乘膠水出膠州西南一百二十里鉄櫛

山北經高密平度昌邑界入海 今水經膠水源出膠州

西南鉄櫛山過密州五弩山鹵水入焉又北過高密縣注

瀦澤與張奴水合由澤北入新河逕平度州昌邑縣界入

海 大清一統志膠水源出今膠州之膠山北流至高密

縣東平度州西昌邑縣東掖縣西又北至海倉口入海

皇朝通志膠河有二北膠河源出膠州西北經高密縣東

入百脉湖有分水嶺北水來會北流有藥石河自平度州

來會又西北至昌樂縣東又北入于海南膠河出高密縣

分水嶺南東流有白沙河自平度州來會折東南經膠州

北有大沽河合小沽河來會又南入于海 水道提綱膠

水源出膠州西南境鉄櫛山亦曰膠山北流經高密縣東

入百脉湖其北連山卽分水嶺也嶺北有水北流爲北膠河折而西北又折而南經平度州城東又經州西境又西北至昌樂縣東境新河橋之西北入海曰膠河曰南膠河自分水嶺南東流承白沙河水又折而東南經膠州北境會大沽河小沽河又南至州東入于海膠河由一嶺間隔南北分流入海元人嘗欲鑿嶺通運功訖不就

莽曰純德

零段

師古曰零音許于反段音工下反

侯國

王子侯表虜葭康侯澤武帝元狩元年以城陽項王子封

按虜葭卽一史表又作零葭皆傳寫之誤

黔陬故介國也

春秋僖二十九年介葛盧來杜注介東夷國也在城陽一

一縣 袁山松曰一縣有介亭 水經注膠水又北逕

一縣故城西晏謨伏琛並云縣有東西二城相去四十

里 後書淳于恭傳注一縣之山也一故城在今密

州諸城縣東北 郡國縣道記一秦所置在高密郡東

北古介葛盧國也後移于膠水西相去二十里俗名故城

爲東陬而此城爲西陬 師古曰陬音子侯反 晉書音

義黔其廉反又音琴 隋志高密郡膠西縣舊日一開

皇十六年改 寰宇記東陬城在諸城縣東北一百十里

故介國也後移于膠水西去故城三十里時人謂之西黔
城在諸城東北九十五里膠水西 齊乘——山名也後
漢淳于恭客隱琅邪——山則縣乃因山以名也 大清
一統志——故城在今萊州府膠州西南介亭在膠州南
七十里

雲侯國

王子侯表——夷侯信武帝元朔四年以齊孝王子封
計斤莒子始起此

左傳襄二十四年齊崔杼伐莒侵介根杜注介根莒邑今
城陽黔陬縣東北計基域是也如淳曰斤音基 水經注
游水左逕琅邪——縣故城西莒子始起此後徒莒故世

謂此爲南莒也

師古曰——卽計基左氏傳所謂介根

也語音有輕重耳

大清一統志——故城在今萊州府

膠州

漢書考異據續志及劉昭所引左氏之介根證之

則後漢時此縣并入黔陬矣

漢書顏注拾遺按——縣

杜預謂之計基城寰宇記云卽左傳所謂介根城皆音之

轉耳

按莒已姓子爵武王初封茲與期于計爲莒國都

介根今萊州府膠州西南五里有介根城漢置——縣卽

此寰宇記謂——故城在高密縣東南者誤也

後徒莒

大清一統志莒城在今江南海州贛榆縣西舊志云在縣
西十五里今爲莒城鎮 按莒卽今山東沂州府莒州接

江南海州界莒子初都介根不知何年徒此戰國時楚簡
王滅莒地入于齊爲莒邑齊潛王走莒卽此

有鹽官

稻

寰宇記漢一縣故城舊地理書皆失其所在其在今高密
縣西南故濰水堰之側昔漢朝于此立堰造塘溉一田數
千頃縣因以爲名 齊乘高密西南濰水堰側土人呼爲
趙貞女防南有高隄卽一城遺跡春秋稱琅邪之一自漢
有塘堰蓄濰水以溉一因名其城旁有一田萬頃斷水造
魚梁歲收億萬號萬疋梁今其遺跡鞠爲榛莽矣 大清
一統志一縣故城在今萊州府高密縣西南舊志云在縣

西南五十里

侯國

王子侯表一夷侯定武帝元光四年以齊孝王子封
臯虞

寰宇記一一故城在卽墨縣東北五十里 大清一統志

一一故城在今萊州府卽墨縣東北縣志云今名一一社
侯國

王子侯表一一煬侯建武帝元鼎元年以膠東康王子封
莽曰盈廬

平昌

王子侯表文帝四年封齊悼惠王子卽爲一一侯 水經

注濰水又北逕——縣故城東荆水注之水出縣南荆山
 阜東北流逕——縣故城東城東南有臺臺下有井與荆
 水通昔常有龍出入于其中故世亦謂之龍臺城荆水又
 東北流注于濰水又北浯水注之 又云浯水又東北逕
 ——縣故城北又東北注于濰水 寰宇記——故城在
 今密州安邱縣南六十里 山東通志——城在諸城縣
 東北六十里柴溝東南 大清一統志——故城在今青
 州府安邱縣南

長廣

寰宇記——故城在今萊陽縣東六十里 大清一統志
 ——故城在今登州府萊陽縣東

有萊山萊王祠

史記封禪書六日月主祠之萊山帶昭曰在東萊——縣
 隋志東萊郡膠水縣舊曰——仁壽元年改

奚養澤在西秦地圖曰劇清池幽州藪

夏官職方幽州澤藪曰奚養鄭注奚養在萊陽杜子春讀

奚爲奚 晉書地道記奚養澤在北海柘縣西 元和志

奚養澤在今萊州昌陽縣西北四十里 齊乘高密縣有
 都灤者水經注謂之夷安潭秦地圖謂之劇清地 太清

一統志奚養澤在今萊陽縣東五十里 地理志稽疑職
 方之澤惟此湮沒

有鹽官

橫

寰宇記一縣故城在廬山之北盧水之側 肇域記諸城縣東南四十五里有廬山山北有漢一縣故城 大清一統志一縣故城在今青州府諸城縣東南四十里 故山久台水所出東南至東武

屬木郡

入澗

水經注澗水又北右合盧水盧水卽久台水也水出琅邪一縣故山山在東武縣故城東南世謂之廬山也其水西北流逕昌縣故城西又東北流逕東武縣故城東西北入澗 師古曰台音怡蘇軾超然臺記其東則廬山秦

人盧敖之所從遁也 方輿紀要盧水源出廬山北流入

澗一名台水近志訛爲久台水廬山在諸城縣東南四十里以秦博士盧敖隱處而名其北卽廢橫縣也 大清

一統志廬山在諸城縣東南三十里本名故山盧水舊名久台水北流入澗 殿板漢書考證名台水當依水經注作久台水久名字形相近而誤耳 水經注釋按漢志云

一故山名台水所出益一旬故山名句台水所出句以山杏名一山縣因山以受氏亦曰一耳然其山又名廬山故台水亦曰盧水道之依漢志以立文乃曰一縣故山可謂疏鹵之至後人不察遂致久台名台之錯出耳 又云周禮職方兗州其浸盧維班固僅志禹貢之維水而盧水無

聞師古以為在濟北盧縣而泰山之盧又無盧水也全謝山欲以城陽盧縣之盧川水當之竊謂不如用琅邪橫縣之台水本出盧山曰盧水東南至東武入濰見于地理志以此當職方之浸庶為可據也

莽曰令邱

東莞

春秋文十一年季孫行父帥師城諸及鄆杜注鄆莒魯所爭者城陽姑幕縣南有員亭員即鄆也 又襄十一年季孫宿帥師救台遂入鄆杜注鄆莒邑 又昭元年季孫宿伐莒取鄆 王子侯表武帝元朔二年封城陽共王予吉為——侯 孟康曰——故鄆邑今鄆亭是也 水經注

沂水又東南逕——縣故城西與小沂水合小沂水出黃孤山西南流逕其城北西南注于沂 師古曰莞音官

晉書音義莞音丸 元和志今沂州沂水縣本漢——縣即春秋莒魯所爭之鄆邑也城陽姑幕縣南有員亭即鄆也俗變其字耳 寰宇記沂水縣在沂州西北二百里本

漢——縣地 肇域記沂水縣西北有古城漢之——縣也 大清一統志——故城即今沂州府沂水縣治舊志

云有故城在今縣西北二十里 按春秋時魯有兩鄆昭公所居者為西鄆在東平莒魯所爭者為東鄆在此文十二年季孫城鄆時鄆方屬魯後入于莒襄十二年雖入鄆而未能有之至昭元年代莒取鄆始屬魯矣杜注云今有

員亭員卽鄆也古鄆員聲同通用

術水南至下邳

屬東海郡

入泗過郡三

過琅邪城陽東海三郡

行七百一十里青州濰

夏官職方青州其浸沂沭鄭注沭出東莞鄭司農沭或作

洙說文沭水出琅邪一一有州浸水經沭水出一一

縣西北山東南過其縣東又東南過莒縣東又南過陽都

縣東入于沂注云沭水出一一縣大弁山與小泰山連麓

而異名也東南逕其縣東又東逕東海厚邱縣西南出左

會新渠逕宿豫縣注泗水師古曰術水卽沭水也音同

經典釋文沭音述李音餘戍反元和志沭水俗名漣水

出沂山東麓逕大峴山峴水入焉大清一統志沭水源

出沂水縣北東南流經莒州東又西南流經蘭山縣東又

南經郯州縣東又東南流入江南沭陽縣界分爲二派下

流入海水道提綱沭河卽古沭水亦曰術水源出沂水

縣南西北之沂山東南流凡二百數十里經莒州城東又

南入江南贛榆縣西北界又西南經邳州東境沭陽縣西

北境至司吾驛南折而東流至縣西分爲二派並入于海

魏其

方輿紀要一一城在今沂州南大清一統志一一故城

在今沂州府蘭山縣南 新校地理志魏者魏也以山之
高氏縣也

侯國

王子侯表——煬侯昌武帝元鼎元年以膠東康王子封
按功臣侯表高帝六年封周定孝景三年封竇嬰並即
此

莽曰清泉

昌

水經注盧水又西北逕——縣故城西 肇域記諸城縣東
北二十里有——城漢琅邪屬縣也 山東通志——城在諸
城縣東北三十五里——城社 大清一統志——縣故城在

今青州府諸城縣東北 按王子侯表有——侯差武帝元
狩元年以城陽頃王子封即此而水經注以為信都之——
城誤矣又有——鄉侯憲膠東頃王子又——鄉侯旦東平楊
王子並即此——縣也
有環山祠

茲鄉

春秋昭五年莒牟夷以防茲來奔杜注茲莒邑城陽姑幕
縣東北有茲亭 大清一統志——故城在今青州府諸
城縣西北

侯國

王子侯表——孝侯宏宣帝甘露四年以城陽荒王子封

按表又有祝茲侯延年膠東康王子注曰琅邪據本志
琅邪無祝茲而有——注云侯國疑卽此地索隱謂廬江
之松茲亦作祝茲竊意膠東王子所封當以琅邪爲是齊
乘云卽墨縣東有祝茲城二漢並無此縣蓋鄉聚之名取
爲國號如平津博陸之類耳餘詳廬江松茲縣下
箕

寰宇記——山在今密州莒縣北八十里——縣蓋因山以爲
名今故城在縣東北一百餘里其山在濰水之西 齊乘
——城在莒州東北一百里箕屋山下濰水出此 大清一
統志——城在今沂州府莒州西北九十里
侯國

王子侯表——愿侯文宣帝甘露四年以城陽荒王子封

禹貢濰水

舊作維水誤

北至都昌

屬北海郡

入海過郡三

過琅邪高密北海三郡

行五百二十里兗州寢也

禹貢濰淄其道

夏官職方兗州其浸廬濰鄭注濰出琅

邪——縣

左傳襄十八年晉師東侵及濰杜注濰水在東

莞東北至北海都昌縣入海

又昭十二年中行穆子曰

有酒如淮有肉如坻劉綽曰淮當作濰 史記淮陰侯傳
龍且與信夾濰水而陳信使人決壅囊水大至龍且軍不
得渡遂殺龍且 說文濰水出琅邪一屋山東入海以水
維聲 水經濰水出琅邪一縣濰山東北過東武縣西又
北過平昌縣東高密縣西淳于縣東又東北過都昌縣東
又東北入于海注云許慎呂忱並云濰水出一屋山淮南
子曰濰水出覆舟山蓋廣異名也東北逕其縣故城西又
西折泉水注之又東北逕諸縣故城西東武城縣西 元
和志濰山在密州莒縣東北八十三里濰水所出 日知
錄濰字或省水作維或省系作淮又或从心作惟摠是一
字古人之文或省或借其旁並从鳥佳之佳則一後人誤

讀爲淮沂其又之淮而呼此水爲淮河失之矣 今水經
濰水源出莒州西北九十里箕屋山自密州諸城縣界流
入高密縣境逕昌邑濰縣界東北入海 大清一統志濰
水源出莒州東北東流入青州府諸城縣界逕縣北五里
折而北逕萊州府高密縣界又北逕安邱縣東又北逕萊
州府昌邑縣界入海 地理今釋濰水出今山東青州府
莒州西北九十里箕屋山卽濰山也土人名爲淮河東流
經諸城縣西折而北至萊州府昌邑縣東北五十里入海
水道提綱濰水俗曰淮河又曰東淮河源出莒州北境
之箕屋山東北流又東南流至諸城縣西山麓又東又折
而東北維經縣城北又西北有大浯河小浯河來注之又

北逕安邱縣東有東汶河來會又西北經濰縣東又北至昌邑縣東南又東北入海白淮河口 又云地志中濰亦作維亦作惟亦作淮實皆維字耳今俗猶稱此水為東淮河知自漢已然矣水經注引此志總曰入濰是也 按說文濰水出琅邪一屋山謂出琅邪一縣之屋山耳非山名箕屋也諸地志皆謬

禕

說文作禕 應劭曰音禕 集韻作滌 寰宇記一縣蓋即古向城在莒縣南七十三里 大清一統志一縣故城在今沂州府莒州南亦曰向城本春秋時向國隱公二年莒人入向即此

夜頭水南至海

寰宇記輿地志云向水南至海夜頭向水蓋異名也舊地志書皆失其所在今莒縣南七十里故向城春秋時向邑即一縣也與折泉境相近 大清一統志夜頭水在莒州南

莽曰識命

高廣

寰宇記一一漢縣其地蓋在今密州莒縣南界已無迹可考

侯國

王子侯表一一節侯勳宣帝甘露四年以城陽荒王子封

高鄉

寰宇記故一一城在今密州莒縣東南七十三里晉永嘉後城廢疑即今十字路城 方輿紀要一一城在今莒州東南七十里 大清一統志一一故城在今沂州府莒州南

侯國

王子侯表一一節侯休宣帝甘露四年以城陽惠王子封柔侯國

按王子侯表有棗原侯山宣帝甘露四年以城陽荒王子封注曰琅邪據本志琅邪無棗縣則棗為一一之譌無疑即來侯國

王子侯表一一節侯伎宣帝甘露四年以城陽荒王子封莽曰盛睦

宋祁曰睦當作陸

麗

表作麗茲

侯國

王子侯表麗茲其侯賜成帝建始二年以高密頃王子封武鄉侯國

王子侯表一一侯慶成帝建始二年以高密頃王子封莽曰順理

宋祁曰理當作里

伊鄉侯國

王子侯表——頃侯遷元帝永光三年以城陽戴王子封新山

寰宇記——漢縣其地當在今密州莒縣界侯國

功臣侯表——侯稱忠元帝永光四年封

高陽

寰宇記——城在今高密縣西北三十四里 齊乘今有——村 大清一統志——故城在今萊州府高密縣西北

侯國

恩澤侯表——侯薛宣成帝鴻嘉元年封

昆山

寰宇記——漢縣其地當在今莒州界 齊乘——城在莒州南今無迹可考 肇域記諸城縣西南六十里有——城漢縣也在——之西 大清一統志——故城在今青州府諸城縣西南六十里——西七里縣以此山名也

侯國

王子侯表——節侯光元帝初元元年以城陽荒王子封參封侯國

王子侯表——侯嗣元帝永光三年以城陽戴王子封

折泉

寰宇記——故縣在今莒州東北分流山之北 大清一

統志——故城在今青州府諸城縣西南七十里

侯國

王子侯表——節侯根元帝初元元年以城陽荒王子封

折泉水北至箕

屬本郡舊作莫誤

入濰

水經注折泉水出折泉縣北松山東南流逕縣東又東北流至箕縣北入于濰 寰宇記折泉水舊地理書並失其所在蓋今莒縣東北分流山之北有滑水源其涓水即古

折泉水也 大清一統志松山即分流山在今諸城縣西

南六十里折泉水在縣西南七十里自分流山西發源流

至沂州府莒州境入濰 殿板漢書考證齊召南曰漢無

莫縣水經注引此文曰至箕縣北入濰然則莫字係字之

訛也

博石侯國

王子侯表——頃侯淵元帝初元元年以城陽荒王子封

房山侯國

王子侯表——侯勇元帝初元元年以城陽荒王子封

慎鄉侯國

按王子侯表有順陽侯共成帝建始二年以膠東頃王子

封錢獻之以為即此縣

駟望侯國

功臣侯表一一忠侯洽廣元帝陽加元年封

莽曰洽鄉

師古曰洽音零

安邱

大清一統志漢有二一一屬北海者故城在今縣西南屬琅邪者故城在今縣東南

侯國

王子侯表一一侯常成帝鴻加元年以高密頃王子封

莽曰寧鄉

高陵

史記項羽本紀宋義使於齊道遇齊使者一一君顯晉灼曰一一縣名屬琅邪

侯國

恩澤侯表一一其侯翟方進成帝永始二年封

莽曰蒲陸

臨安侯國

王子侯表一一侯閔成帝永始二年以膠東其王子封

莽曰誠信

石山侯國

王子侯表一一節侯玄元帝永光三年以城陽戴王子封

漢書地理志補注卷三十六

東海郡

常熟 吳卓信 編纂

左傳季札聞齊音曰表一一者其太公乎 戰國策齊湣

王謂張儀曰齊僻陋隱居一一之上 方輿紀要一一

秦薛郡地今兗州府東南至南直邳州以至一一是其地

按漢一一今山東沂州府之蘭山郯城費三縣兗州

府之泗水勝嶧三縣又江蘇徐州府之宿遷及邳州海州

之贛榆沐陽二縣皆其地

高帝置

地理志稽疑東海故秦郡楚漢之際改名郯郡屬楚國高

帝五年屬漢復故仍屬楚國景帝二年復故 又云前志于泗水國曰故——于——曰高帝置則似秦之——非漢之——也而實不然秦——治郟見陳勝傳漢——亦治郟豈有二乎泗水乃分置之國耳然前志尙存秦——之目續志則竟去之故胡梅磻謂春無——按秦——之名不特見陳勝傳亦見周勃傳安得云無顧宛溪亦仍其謬 又云郟郡卽秦——楚漢之間改名漢復曰——見高紀以封楚王劉貢父曰郟非秦郡足正應劭之誤然不知卽秦之——也治郟故改名曰郟 秦漢郡國考高帝紀六年以碭郡薛郡郟郡立弟交爲楚王楚王交傳郟郡作——應劭曰——秦郟郡酈元沂水注云郟縣——治秦始皇以爲郟郡漢高帝二年更從今名史記陳涉世家陵人秦嘉等皆將兵圍——守慶于郟是時未有——史家以今名追書之而秦有郟郡郡治郟是其據證也又絳侯世家籍已死因東定楚地泗水——此改郟郡爲——之始

莽曰沂平

後書劉盆子傳赤眉與王莽沂平大尹戰注云莽改東海郡曰沂平

屬徐州縣三十八

郟蘭陵襄賁下邳良成平曲戚胸開陽費利成海曲蘭祺繒南成山鄉建鄉卽卽祝其臨沂厚卽容卽東安合鄉承

建陽曲陽司吾于鄉曲平都陽陰平都鄉武陽新陽建陵

昌慮都平

郟故國少昊後盈姓

春秋襄七年一子來朝 又定三年仲孫何忌及邾子盟

於拔傳作盟于一杜注一卽拔也 又定四年公及齊侯

平莒及一 本書史丹傳封武陽侯食東海一之武疆聚

城家記一城在沂沭二水之間城周十餘里西南去邳

州八十里 應劭曰一音談 水經注沂水又南逕一縣

西縣故一國也 元和志故一城在泗今州下邳縣東

一百五十里古一子國孔子問鳥官于一子卽此地 寰

宇記古一城在今淮陽軍下邳縣東北一百五十里故一

子國城也宋滅一以爲縣 通志都邑略郟初姓子爵或

曰贏姓少昊之後 寰宇通志一郟在淮安府邳州城北

五十里 方輿紀要一城在今山東沂州一城縣西南百

里江南邳州東北八十里 大清一統志沂州府一城縣

春秋一子國漢置一縣舊志云有故城社在縣西二十里

又古縣社在縣西南三十里皆其遺址

蘭陵

史記荀卿傳荀卿適楚春申君以爲一一令因家一一

本書五行志惠帝二年有兩龍見于一一廷東里温陵并

中師古曰一一縣之廷東里也温陵人姓名 孟康曰次

室亭魯伯是 晉書地道記一一故魯次室邑列女傳有

漆室之女或作次室 十三州志——故魯次室邑其後
 楚取之改爲——縣 史記正義今沂州承縣有——山
 漢爲魯晉置——郡別理水城非此矣 元和志——
 故城在今沂州承縣東六十里荀卿——今卽此 九域
 志沂州承縣有——鎮 困學記聞荀卿爲——今在漢
 屬東海郡今沂州承縣誠齋延陵懷古有——令一章蓋
 誤以南——爲楚之——也古靈詩亦誤 齊乘古——
 城在沂東南六十里 大清一統志——故城在今兗州
 府嶧縣東五十里

莽曰蘭東

襄賁

荀子說齊相曰楚人則有——開陽以臨吾左 本書周
 勃傳沛公拜勃爲——令 應劭曰賁音肥 水經注沂
 水又東逕——縣東魯連子稱陸子謂齊潛王曰魯賁之
 衆臣甲舍于—— 後書祭彤傳注——故城在今沂州
 臨沂縣南 隋志東海郡連水縣舊曰——開皇初改
 齊乘——城與鍾離城相對俗訛作鑿城 方輿紀要今
 淮安府安東縣漢——縣地 大清一統志——故城在
 今沂州府蘭山縣西南一百二十里 按王子侯表有鱣
 侯應武帝元狩元年以城陽頃王子封注曰——則鱣當
 是——縣之鄉名也

莽曰章信

下邳

竹書紀年商外壬元年姚人邳人叛 左傳昭元年趙孟曰商有姚邳杜注二國商諸侯邳今一一縣 又定元年薛宰曰薛祖奚仲遷于邳 史記田齊世家威王封鄒忌于一一一號曰成侯 本書高帝紀漢王五年即帝位曰義帝無後齊王韓信習楚風俗徙為楚王王淮北都一一 又張良傳良嘗間從客步游一一圯上 應劭曰邳在薛其後徙此故曰下 臣瓚曰有上邳故曰一一也 水經沂水又南過一一縣西南入于河注云沂水于下邳縣北西流分為二水一水于城北西南入泗一水逕城東屈從縣南亦注泗謂之小沂水水上有橋徐泗間以為圯張子

房遇黃石公于圯上即此處也戴延之西征記云縣有沂

水自城戶西南注泗別下迴城南亦注泗 水經注泗水

又東南逕一一縣故城西東南流沂水流注焉漢徙齊王

韓信為楚王都此後乃縣之縣為沂泗之會又有武原水

注之 史記正義邳被悲反一一泗水縣也 晉書音義

邳符悲反 元和志今泗州一一縣本夏時邳國後屬薛

左傳薛之祖奚仲遷于邳是也春秋并于宋戰國時屬楚

後屬齊至秦曰一一縣漢因之 九域志一一在徐州東

一百八十里 輿地廣記今淮陽軍一一縣夏時奚仲自

薛徙此秦末為東陽郡治秦嘉其邑人也縣處沂泗之會

大清一統志一一故城在今徐州府邳州東舊志云在

州東三里

葛嶧山在西古文以爲嶧陽

禹貢嶧陽孤桐 說文葛嶧山在東海——縣 續郡國

志——有葛嶧山本嶧陽山 劉昭注補嶧陽山出名桐

伏滔北征記曰今槃根往往而存 西征記——城西五

里有葛山卽禹貢所謂嶧陽山也 水經注泗水厯——

縣逕葛嶧山東卽奚仲所遷之邳嶧也 元和志嶧陽山

在今泗水——縣西六里 寰宇記嶧陽山在今淮陽軍

——縣西六里禹貢嶧陽孤桐卽此 寰宇通志葛嶧山

在淮安府邳州治西北今名距山以其與沂水相距也

焦氏筆乘在鄒縣者爲鄒嶧在邳州者爲葛嶧 禹貢錐

指林少穎云嶧山卽詩所謂保有鳧嶧非也漢志東海——

——縣葛嶧山在西古文以爲嶧陽魯國騶縣故邾國嶧山

在北嶧繹古字通今兗州府鄒縣東南有嶧山一名邾繹

亦曰鄒嶧此卽鳧繹之繹左傳邾文公卜遷于繹史記秦

始刻皇石頌功德者也水經注泗水厯——縣逕葛嶧山

東卽奚仲所遷之邳繹元和志謂之嶧陽山此乃禹貢之

嶧陽漢志極其分明林氏混而一之大謬蔡傳主葛嶧是

也 尙書地理今釋嶧陽一名葛嶧山在今江南淮安府

邳州西南俗爲距山以與沂水相距也 山東通志葛嶧

山在今嶧縣東南十五里縣以此得名也但禹貢所云嶧

陽孤桐確係鄒嶧山蓋鄒嶧山無土壤故孤桐爲可貴觀

王氏詩傳鳧繹二山皆徐州地繹與嶧同則嶧陽之為鄒繹無妨于徐州之貢也不知孔穎達何故必欲以葛嶧當之豈以滕嶧為徐而鄒泗為魯耶不知鄒泗皆徐域也保有鳧繹遂荒徐宅此明徵矣或以鄒嶧山多石而葛嶧山多土桐非土不生則王氏之解高人一等矣 大清一統志葛繹山在今江南邳州西北六里山東嶧縣東南十五里嶧縣以此得名亦名繹陽山今名柱子山承水繞其下又云按禹貢孔疏以嶧陽為葛嶧蔡傳因之其說本後漢書注考宋儒以前未有以鄒嶧為嶧陽者獨王應麟詩傳有是說或非無見姑存之以俟考

有鐵官

續郡國志——縣有鐵

莽曰閏儉

良成

後漢作良城 左傳昭十三年晉侯會吳子于良杜注下

邳有——縣 又哀十四年楚伐吳陳侯使公孫貞子弔

焉及良而卒杜注良吳地 水經沂水又南過——縣西

後書明帝紀注——故城在今泗水下邳縣北 寰宇

記——故城在今邳縣北六十里 大清一統志——故

城在今徐州府邳縣北

侯國

王子侯表——頃侯文德昭帝始元五年以魯安王子封

莽曰承翰

平曲

寰宇記——故城在今胸山縣界 大清一統志——故城在今海州沐陽縣東北 新校地理志郡有二——縣疑亦一地而分兩縣也當時分封侯國有此例

莽曰平端

戚

本書高帝紀秦泗州守北兵敗于薛走至——鄭氏曰音憂戚之戚如淳曰音將毒反師古曰讀如本字 又曹參傳遷為——公師古曰為——縣之令 又功臣侯表——圍侯李必高祖十二年封 史記索隱鄭注色愷並如字讀李登

音干笠反 括地志沂州臨沂縣有漢——縣故城 大清

一統志——縣故城在今兗州府滕縣南七十里府志云城周四里

胸

史記淮陰侯傳項王亾將鐘離昧家在伊廬徐廣曰東海

——縣有伊廬鄉 水經注游水厯——縣與沐水合又逕——

山西山側有——縣故 之後書光武紀注——縣故城在今

海州——山縣西南——音其于反田廣韻作胸 續通典——

故城在今——山縣西九十里 寰宇通志——山在淮安府

海州治南上有雙峯如削俗呼為馬耳峯旁有龍潭水極清冽大旱不涸其東北嶺名石棚山又名錦岩 大清一

統志一縣故城在今海州南一山在州南四里秦置一縣
以此 按王子侯表有臨一夷侯奴武帝元朔二年以菑
川懿王子封注云東海據本志有兩臨一縣一屬東萊一
屬齊郡而屬東海者乃一縣無臨一疑傳寫增誤又有枸
侯買武帝元狩元年以城陽項王子封注云東海則枸當
爲一之譌也

秦始皇立石海上以爲東門闕

史記始皇本紀三十五年立石東海上界中以爲秦東
門 博物記一縣東北海邊植石秦所立之東門也 寰
宇記植石廟在今一山縣北四里史記始皇立石東海上
一界中以爲秦東門今門石猶有傾倒爲數段者在廟北

百許步尙可識 水經注釋闕觀也說文云門觀也益古
象魏之制秦皇立石海上狀如宮門之闕也據始皇紀無
闕字

有鐵官

續郡國志一縣有鐵

開陽故鄆國

春秋昭十八年邾人入鄆杜注鄆國今琅邪一一縣林注
鄆小國妘姓禹之後 左傳昭十九年宋公伐邾盡歸鄆
俘 春秋哀三年季孫斯叔孫州仇帥師城啓陽杜注啓
陽今琅邪一一縣 荀子說齊相曰楚人則有襄賁一一
以臨吾左 漢官儀洛陽城門東第一門始成夜有一柱

來止樓上——縣上言南門下一柱飛去卽洛陽城門柱也 說文邠妘姓國讀如規架 水經注沂水又南逕——

縣故城東縣故邠國也 師古曰邠音禹 寰宇記邠

國祝融之後妘姓 輿地廣記漢——故城在今臨沂縣

南 齊乘——城今日邠城在沂州北十五里本作啓陽

避漢景帝諱改爲—— 大清一統志——故城在今沂

州府蘭山縣北舊志云有古城社在沂州東北十五里卽

古——也

莽曰厭虜

師古曰厭音一涉反

費故魯季氏邑

左傳隱八年鄭伯請釋太山之祀而祀周公以太山之祊

易許田三月鄭伯使宛來歸祊不祀太山也杜注祊鄭祀

太山之邑在琅邪——縣南東 僖元年公賜季友汶陽

之田及—— 論語公山弗擾以——畔 孔安國書傳祊魯

東郊地名卽魯季氏之——邑地也 水經注治水又東

南逕——縣故城南說文云沂水出——縣東西入泗字林亦

言是矣斯水東南所注者沂水在西不得言東南趨也皆

爲謬矣故世俗謂此水爲小沂水 元和志今沂州——縣

古——國也後爲季氏邑漢爲縣 大清一統志——縣故城

在今沂州國——縣西北二十里春秋魯季氏邑其外城卽

古祊邑也 按——在魯隱公時爲大夫——伯之食邑卽元

年帥師城卽之。伯也。二年司空無駭入極。今夫勝之。今夫卽。伯自僖公賜于季友遂爲季氏私邑。襄七年城。昭十二年南蒯以。叛並卽此。或曰。伯之。讀如字。其地在今兗州府魚臺縣西南與季氏之邑。讀曰秘者有。別然先儒無此說也。據路史如字讀者乃滑國之。在今河南緱氏縣。又。功臣侯表有。侯陳賀高帝六年封。索隱以爲卽東海之。縣而師古云音扶味反非季氏邑。但不言其所在而此處則曰音秘。顧寧人曰南武城卽。也存以侯考。又按尙書。誓魯世家作勝。誓說文作柴。言徐廣曰一作鮮又作獮。世本又作弗。劉向說苑又作鄩。然魯世家于季氏之邑亦皆作鄩所未審也。

都尉治莽曰順從

利成

續志作利城。水經注游水自胸縣又北逕。縣故城

東故利鄉也。漢武帝元朔四年封城陽其王子嬰爲侯國。

又云武陽溝水東出倉山山上有鹽官城卽故也。

寰宇記。故城在今海州懷仁縣西六十里。九域

志沂州臨沂縣有。鎮。方輿紀要。故城在今海

州贛榆縣西六十里。山東通志。城在蘭山縣東一

百里蒼山之南。大清一統志。故城在今沂州府蘭

山縣東百里其城因山爲基接江南贛榆縣界。

莽曰流泉

海西

舊作海曲誤 十三州志——縣在開陽東百三十里

胡三省通鑑注功臣侯表海西侯李廣利地志屬東海郡

琅邪亦有之然今流俗本皆誤作海曲 大清一統志——

——當作——廢縣在今海州南舊志云在州南一百二十

里 漢書考異曲當作西續志廣陵郡海西縣故屬東海

宋志臨淮郡——縣前漢屬東海後漢晉屬廣陵是也

莽曰東海亭

蘭祺侯國

王子侯表——旗侯臨朝昭帝始元五年以魯安王子封旗
乃旗之譌

莽曰溥睦

緡故國禹後

春秋僖十四年鄆子來朝杜注鄆國今琅邪——縣 又襄

六年莒人滅鄆杜注鄆小國今琅邪——縣 又昭四年取

鄆杜注鄆莒邑 荀子世問篇——邱之封人見楚相孫叔

敖楊倬注——與鄆同鄆邱故國地理志屬東海 史記吳

太伯世家敗齊師於艾陵遂至—— 又蘄款傳略地東至

—— 又貨殖傳胸——以北其俗齊 說文鄆姒姓國在東

海从邑曾聲 寰宇記——故城在今承縣東八十八里

大清一統志——縣故城在今兗州府嶧縣東八十里

莽曰——治

南城

春秋襄十九年城武城杜注太山南武城縣 左傳哀八年吳師克東陽劉昭曰太山一一縣有東陽城 又哀十四年司馬牛卒于魯郭門之外阮氏葬諸邱輿杜注太山南城縣西北有輿城錄其卒葬所在愍賢者失所也 史記田齊世家吾臣有檀子者使守南城則楚人不敢爲寇 後書劉盆子傳注南城縣有南城山因以爲名也 元和志南城縣在今沂州費縣南九十里 一統志南武城故城在今沂州府費縣西南九十里 顧炎武曰史記仲尼弟子傳曾參南武城人澹臺滅明武城人同一武城而曾子獨加南字南武城故城在今費縣西南八十里

石門山下正義曰地理志定襄清河並有武城故此加南春秋襄十九年城武城杜注云今太山南武城縣然漢書太山無 城而有一一東海郡屬後書作南城屬太山郡至晉始爲南武城此後人之所以疑也程大昌澹臺祠友教堂記曰武城有四左馮翊太山清河定襄皆以名縣西清河特曰東武城者以其與定襄皆隸趙且定襄在而故也若子游之所宰其實魯邑而東武城者魯之北也故漢儒又加南以別之史遷之傳曾參曰南武城者荆加也子羽傳次曾子省文但曰武城而水經注引京相璠曰今太山南武城縣有澹臺子羽冢縣人也可見武城之卽爲南武城也孟子言曾子居武城有越寇新序則云魯人攻

鄆曾子辭于鄆君戰國策甘茂亦言曾子處費則曾子所居之武城費邑也哀八年傳吳伐我子洩率故道險從武城又曰吳師克東陽而進舍于五梧後漢志云南城有東陽城引此爲證又可見南城之卽爲武城也南城之名見于史記齊威王曰吾臣有檀子者使守南城則楚人不敢爲寇漢書但作——王符潛夫論云鄙畢之山南城之冢章懷注南城曾子父所葬在今沂州費縣西南此又——之卽爲南城而在費之證也

侯國

王子侯表——節侯緡宣帝甘露四年以魯共王子封按城當作成城陽王子分封當屬東海無疑若南城則

屬豫章矣疑遠本志——曰侯國可証

山鄉

侯國

王子侯表——節侯緡宣帝甘露四年以魯共王子封

建鄉

侯國

王子侯表——釐侯康成帝陽朔四年以魯頃王子封

卽卽

春秋桓五年齊侯鄭伯如絕城祝邱 又莊四年夫人姜氏享齊侯於祝邱杜注祝邱魯地 孟康曰——故祝邱續志——春秋曰祝邱 水經注沫水又南逕——縣

故春秋之祝邱也闕駟曰卽祝魯之音益字承讀變矣
又云游水又左逕——縣故城西 後書吳良傳注——
故城在今沂州臨沂縣東南 輿地廣記漢——縣故城
在今臨沂縣東南 路史祝邱祝融氏之後臨沂東南五
十里——城是也 齊乘——城在今州東南五十里
一統志——故城在今沂州府蘭山縣東南
莽曰就信

祝其

春秋定十年公會齊侯于夾谷左傳公會齊侯于——實
夾谷杜注夾谷齊地卽——也服虔曰地有二名 史
記周本紀武王封黃帝之後于祝服虔曰卽—— 續志

——春秋時夾谷地 太康三年地記故——城在郟東
九十里 水經注游水自羽山又北逕——縣故城西縣
東有夾口浦 寰宇記故——城在今海州懷仁縣南四
十二里平地 一統志——故城在今海州贛榆縣南舊
志云在縣西五十里夾谷山西亦南五十里 顧炎武曰
杜預解及服虔注史記皆云在東海——縣劉昭杜佑並
引之遂謂夾谷山在今贛榆縣西五十里按贛榆在春秋
爲莒地與齊魯之都相去各五六百里何必若此之遠金
史云淄川有夾谷山 一統志云夾谷山在淄川縣西南舊
名——山其陽卽齊魯會盟處萌水發源于此水經涇盟
水出般陽縣西南甲山是以甲山爲夾谷也而萊蕪縣志

則又云夾谷在縣南三十里接新泰界未知何據然齊魯之境正在萊蕪東至淄川則已入齊地百餘里二說俱通考水經注云萊蕪縣城在萊蕪谷當路阻絕兩山間道由南北門舊說云齊靈公滅萊二民播流此谷邑落荒蕪故曰萊蕪禹貢所謂萊夷也夾谷之會齊侯使萊人以兵劫魯侯宣尼稱夷不亂華是也是則會于此地故得有萊人非召之東萊千里之外也不可因——之名而遠求之海上矣 顧棟高曰——故城在今江南海州贛榆縣西五里卽春秋時夾谷漢爲縣其地北至曲阜魯都有三百餘里而齊更在魯北齊強魯弱豈能屈駕至魯之南境而與會魯又何苦越其國都而會齊于國之南鄙耶舊說以濟南府淄川縣西南三十里有夾山上有夾谷臺爲齊魯會盟處猶以兩君相會不應去齊若此之近去魯若此之遠而以泰安府萊蕪縣夾谷峪爲萊兵劫魯侯處庶幾近之若海州贛榆則斷無是理也

禹貢羽山在南縣所殛

禹貢蒙羽其藝正義引本志羽山在東海——縣南 舜典殛鯀于羽山孔傳羽山東夷在海中 郭璞南山經注今東海——縣西南有羽山卽鯀所殛處計其道理不相應似非也 左傳昭七年子產曰昔堯殛鯀于羽山其神化爲黃熊以入于羽淵杜注羽山在東海——縣西南 博物記東北獨居山西南有淵水卽羽泉也俗謂此山爲

懲父山 水經注游水又北歷羽山西舜殛鯀于此 隋書地理志胸山縣有羽山 寰宇通志在海州贛榆縣西北八十里山出五色雉羽因名去云百步有羽潭一名羽池鯀化爲黃熊入于羽淵卽此 續志一一有羽山劉昭注殛鯀之山 括地志羽山在沂州臨沂縣界 元和志羽山在今密州胸山縣西北一百里書曰殛鯀于羽山卽此也 寰宇記羽山在今胸山縣西北九十里高四里周回八里羽潭去山一百步一名羽池 一統志羽山在今海州西北 胡渭曰一一縣南有羽山杜預左傳注亦云在一一縣西南縣之故城在今贛榆縣界而隋志胸山縣有羽山 元和志云羽山在胸山縣西北一百里又云在

臨沂縣東南一百十里與胸山縣分界胸山今海州臨沂今沂州也近志郟城縣東北亦有羽山接贛界齊乘云羽山日在胸山縣東北九十里亦屬沂州在東南百二十里時郟城未復故在州境也諸說不同要之此山在沂州之東南海州之西北贛榆之西南郟城之東北實一山跨四州縣之境也明統志云在贛榆縣西北八十里則誤矣說者皆以此山爲舜殛鯀處山下有羽潭卽左傳所謂羽淵者也愚謂此地太近非荒服放流之宅書孔傳云羽山縣夷在海中今登州府蓬萊縣有羽山寰宇記云在東東十五里卽殛鯀處有縣城在縣南六十里以近殛鯀之地而名此與孔傳謂在海中者合當從之齊乘九日山東北二

十里有龙山又北卽羽山蓬萊新去志在縣東南三十里
禹貢之羽在徐域舜典之羽青城不可以無辨 閻若
據曰登州古萊夷地三面距海故謂之海中殛鯀于此正
荒服所謂二百里流者也

莽曰猶亭

臨沂

後漢屬琅邪國 水經注沂水又南逕——縣故城東有
治水注之俗謂之小沂水 魏書地形志卽邱縣有——
城 元和志今沂州——縣本漢舊縣也東臨沂水故名
之一統志——故城在今沂州府蘭山縣北舊志云有
——社在沂州北五十里故縣治此

厚邱

水經注沭水又南逕——縣分爲二瀆西南出今無水世
謂之枯沭 通典今海州沭陽縣漢——縣地有沭水沭
音述 寰宇記——故城在沭陽縣北六十里郟城東一
百里 九域志沭陽縣有——鎮 一統志——故城在
今海州沭陽縣北舊志云——鎮在縣西北四十里卽故
縣也 名勝志——城在今淮安府沭陽縣北六十里
按恩澤侯表高樂侯師丹坐漏洩免更爲義陽侯注曰東
海據本志東海無義陽縣而本傳謂以東海之——爲國
莽曰祝其亭

容邱

侯國

王子侯表——戴侯方山昭帝始元五年以魯安王子封
祠水東南至下邳入泗

水經注桐水出西北——縣東南至下邳入泗 王峻曰
祠水當從水經注作桐水

東安

水經注沂水南逕——縣故城東而南合時密水水出時

密山東流逕——城南又東南流入于沂 寰宇記——

故城在今海州朐山縣西八十三里 寰宇通志——

縣在淮安府海州西八十里 山東通志——城在沂水

縣南五十里 一統志——故城在今海州西 按城陽

國亦有——縣

侯國

王子侯表——孝侯強宣帝甘露四年以魯孝王子封

莽曰業亭

合鄉

春秋襄十九年取邾田自鄆水杜注鄆水出東海——縣

西南經魯國至高平湖陸縣入泗 又哀二年伐邾取鄆

東田 水經注鄆水出東海——縣西南流入邾 續志

作合城 劉芳徐州記——即古之互鄉孔子所謂難與

言者 元和志——故城在勝縣東二十三里即論語所

謂互鄉是也 寰宇記——故城在今徐州沛縣界即古

互鄉之地 一統志 一故城在今兗州府勝縣東

莽曰合聚

承

應劭曰音證 廣韻 一縣名在沂州匡衡所居常證切又

音承 後書劉永傳注音時證反 元和志今沂州承縣

本漢縣春秋時鄆國也以西北有 一水故名 續志作承

隋志彭城郡蘭陵縣舊曰承大業初改 寰宇記承治

水出縣西北方山之東王莽改 一縣為 一治故水有此名

今又譌為承治 齊乘嶧州城西北小城古 一縣城也 一

水溉田千餘頃旁多美竹人賴其利今否 肇域記嶧縣

西北一里有故 一城漢縣也廣韻 一音拯作承者非 一

統志 一縣故城在今兗州府嶧縣西北一里漢置縣以 一

水所經而名 一水在縣西今名承河治東海至縣東南五

十里會泲河入運河 按王子侯表魯孝王子當楚孝王

孫闕先後皆封 一鄉侯並即此

莽曰 一治

建陽

後書劉永傳注 一縣故城在今沂州承縣北 一統志

一故城在今兗州府嶧縣西

侯國

王子侯表 一節侯咸宣帝甘露四年以魯孝王子封

莽曰建力

曲陽

應劭曰在淮曲之陽 後書泗水王傳注——縣故城在
今海州朐山縣西南 寰宇記——故城在今朐山縣西
南一百十里 一統志——故城在今海州西南

莽曰從陽

司吾

左傳昭二十七年公子燭庸奔鐘吾杜注鐘吾小國 又
三十年吳執鐘吾子 水經注橫溝水逕——山東 又
沭水故瀆又逕——縣故城西 寰宇記——故城在今
宿遷縣西北十里——故卿是也即古鐘吾子國吳滅之
漢為縣 一統志——故城在今徐州府宿遷縣北舊志

云有——鎮在縣北六十里同晤山在縣北七十里一名
同吾山又名司鎮山谷譌同晤山漢置——縣以為此山
名也 方輿紀要同晤山在宿遷縣北七十里上有石同
泉流不渴同晤鎮在同晤山下 按通鑑後漢孔祐二年
敗唐兵于同晤鎮胡梅磻注同達貢反又崔董反此誤也
同為同字之譌同晤即——也後人增加山旁胡氏遂讀
為崆同之同疏略甚矣今徐州府宿遷縣西北有——鄉
即春秋之鍾吾國漢——縣也

莽曰息吾

于鄉

錢坫曰泗水國有于縣此則其縣之鄉也

侯國

王子侯表——節侯定元帝永光三年以泗水勤王子封曲平

舊作平曲誤 齊召南曰縣邑同名者皆異郡故或加東西等字以別之東海一郡而平曲二縣同名殊不可曉以莽所更名一名平端一曰端平推之或者第二平曲是曲平乎 全祖望曰按水經注誤引——作西平苟非曲平何以成此誤乎此亦可證第二平曲之當為曲平也 趙一清曰按後漢書萬修傳永初七年鄧太后紹封修曾孫豐為曲平亭侯則第二——之為曲平非無證也

侯國

王子侯表——節侯曾宣帝本始元年以廣陵厲王子封按功臣侯表——共侯周堅孝景後元元年封又——侯公孫渾邪孝景六年封並即此

莽曰端平

都陽

春秋閔二年齊人遷陽杜注陽國名 應劭曰——即春秋齊人遷陽是 錢大昕曰按城陽國陽都縣注亦引應劭曰齊人遷陽故陽國是二注似有一誤然——侯音本城陽戴王之子或當日即割陽都鄉為侯國本非兩地乎 錢坫曰城陽國有陽都縣在今沂州府沂水縣西南後漢書注云——在承縣南則此亦在今嶧縣西南矣疑兩

存之可也

侯國

王子侯表——節侯音元帝永光三年以城陽戴王子封陰平

後書袁安傳注——故城在今沂州承縣西南 寰宇記

——故城在今海州沐陽縣西北六十里 肇域記嶧縣

西南三十里有——城漢縣 一統志——故城在今江

南海州沐陽縣西北十四里山東兗州府嶧縣西南三十

里

侯國

王子侯表——釐侯回成帝陽朔二年以楚孝王子封

郡鄉

左傳文九年城郟杜注卞城南有郟城 師古曰郟音吾

又音魚 一統志——故城在今兗州府泗水縣東南

侯國

王子侯表——侯閔成帝陽朔四年以魯頃王子封

莽曰徐亭

武陽

按恩澤侯表成帝鴻嘉元年封史丹為——侯據本傳云

食東海郟之武疆聚則——亦今郟縣地也

侯國

功臣侯表——侯蕭則文帝後元二年以何孫遣弟紹封

莽曰宏亭

新陽

侯國

王子侯表——頃侯永成帝鴻嘉二年以魯頃王子封

按本志汝南東海並有——而屬東海者為侯國又係魯

王子則東海是也

莽曰博聚

建陵

括地志——故縣在沂州承縣界 寰宇記——山在今

海州沭陽縣西北一百五里縣以此名其山南北狹長有

陵阜故名 地形志——縣有——山 肇域記嶧縣西

四十五里有——城在白茅山之陽 一統志——故城

在今海州沭陽縣西北一百里——山下 方輿紀要——

城在淮安府沭陽縣西北古邾國地亦曰中城後屬魯

左傳成九年城中城杜預曰——縣西南有中城是也漢

置——縣于此——山在縣西北百里與山東邾城縣接

境

侯國

王子侯表——靖侯遂宣帝甘露四年以魯孝王子封

按恩澤侯表高后八年封寺人張釋功臣侯表孝景八年

封衛綰皆為——侯並即此

莽曰付亭

昌慮

春秋莊五年邾犁子來朝杜注附庸國也東海一一縣東

北有倪城 又僖七年小邾子來朝杜注邾之別封故曰

小邾按倪本附庸進爵為子即小邾也後六世為楚所滅 又昭三十一年邾黑肱

以濫來奔杜注濫邾邑今東海一一縣 師古曰慮音廬

後書光紀注一一古邾國之濫邑也左傳邾武黑肱以

濫來奔即曲 寰宇記濫城在滕縣東南五十九里 一

統志一一故城在今兗州府滕縣東南六十里春秋邾濫

邑也府志云城周十里有子城

侯國

王子侯表一一康侯宏宣帝甘露四年以魯孝王子封注

曰太山而木志屬東海

莽曰廬聚

都平

侯國

王子侯表一一愛侯卬宣帝甘露四年以城陽荒王子封

程